

Rinforzar la coesiun naziunala

Cun promover la diversidad linguistica e culturala

■ (anr) Sut «PARLEZ-VOUS SUISSE?» exista ina cuminanza da lavur. Questa cumpiglia 15 organisaziuns. Tranter quellas sa chatta era la Lia rumantscha. Questa uniuon promovava la chapientscha vicendaivla tranter las cuminanze linguisticas. Ella sa cumpo-
na perquai d'organisaziuns da las regions correspondentas da la Svizra. D'ina vart sa fatschenta ella cun la tematica da las linguas, da l'autra cun la chapientscha interculturala e la coesiun naziunala. Ella considerescha la diversidad linguistica sco ina schanza irremplazzabla per l'avegnir da la Svizra. Era vul ella ch'il cussegl federal s'occupe-

schia danovamain cun la lescha da linguas e la suttamettia uschè spert sco pussaivel al parlament.

Las tesas da lavur èn fixadas

Sias pretensiuns ha «PARLEZ-VOUS SUISSE?» formulà en 12 tesas. Questa cuminanza da lavur è cunschenta da sia responsabladad. Per ella èn la quadrilinguitad e diversidad ina schanza preziosa per l'avegnir da la Svizra ed ina resursa culturala ed economica. Las quatter linguas èn la pitga purtanta da noss sistem cultural e social. Pertutgads èn tuts ils umans da noss pajais. Preservar lur cultura è ina premissa per l'existenza futura

da la Svizra sco naziun, fundada sin voluntad politica.

In'administraziun federala plurilingua e chantuns plurilinges èn part integrala da l'identitad svizra. Perquai dovri sin plaun naziunal in center da cumpetenzza da perscrutaziun. Era la scola gio-
ga en quest grau ina rolla essenziala. Dad ella dependa i, sche la quadrilinguitad e plurilinguitad pon vegnir mantegnidas. Indispensabla è numnadamain ina buna ed effizienta instrucziun da linguas. Quai succeda tras innovaziuns sin il sector didactic, ma era cun numerusas pussaivladads da barat che noss pajais porscha. Tut quai contribuescha a

meglra chapientscha vicendaivla ed a la coesiun naziunala. La plurilinguitad viva dentant era da las activitads da bleras organisaziuns da la societad civila. Ina rolla fitg impurtanta per la coesiun naziunala han era las medias.

Engaschi per finamiras comunablas

Las organisaziuns-commembras da la cuminanza da lavur «PARLEZ-VOUS SUISSE?» èn preschentas en il mintgadi da la diversidad linguistica culturala da la Svizra. Questa cuminanza vul unir tut sias forzas en in champ d'activitads comunabel e spera qua tras dad avair dapli effect.